

Йёскалык библиотекалы – даур

23-тй куартолэзе 100 аръем юбилейзэ пусйиз Удмурт Элькунысь Йёскалык библиотека. Кун Кенешлэн залаз люкаськызы быдэс шаерысьтымы библиотекаосын ужась өнерчиос, тодосчиос, кивалтйсьёс – Йёскалык библиотекалэн лыдзисьёсыз но эшъёсыз.

Даур ёже узыр но тунсыко сюресез ортчиз та ужьюрт. 1918-тй арын 15-тй куартолэзе со центральной кар библиотека нимын кылдйз. Соку отын 20 сюрс книга лыдьяськиз. Дыр ортчемъя, библиотека А.С. Пушкинлэсь, бератаз В.И. Ленинлэсь нимзэ нуллйз. Нош 1989-тй арын солы йёскалык статус сётэмын вал. Туннэ библиотекалэн фондёсаз одйг но жыны миллион издание лыдьяське, со пöртэм пумо книгаос, журналъёс, газетъёс, картаос, дискъёс. Пусйыны кулэ, соос пöлын бадзым инты басьтэ удмурт кылын потэм но потйсь литература. Сое люкан, лыдзись доры вуттон-адзйтон сярись сюлмаське йёскалык но шаертдон литературая ёзэт. Со сярись шунйтэн тодаз вайиз Н.П. Лимонова, ёзэтэн трос арьёс ёже кивалтэм өнерчи.

Йёскалык библиотекаысь өнерчиосты уно зечкыланъёс борды ватсаськиськом ми но, «Вордскем кыл» журналын ужасьёс: азинсконъёс но зеч кусыпъёс сйзиськом.

Ирина ТИМИРЗЯНОВА

Ужан амальёсты вöлмытонлы сйзем пумиськонъёс



Куартолэзе «Вордскем кыл» журналлэн редакциезлэн туэ дышетскон ар понна лыдзисьёсын берпуметй ужрадъёсыз ортчизы. Озы 14-тй куартолэзе Можга карысь Т.К. Борисов нимо педагогикая колледжын 2 пумиськон ортчытэмын вал. Одйгез – та ужьюртысь дышетйсьёсын. Соосын «Вордскем кыл» журналлэсь коньывуонэ колледжлэн 100 ар тырмонэзлы сйзьяса потйсь номер пумысен кенешон ортчиз. Мукетаз ужрадэ – «Вордскем кыл» журналлэн вуоно өнерам интыез» дышетон

событие – пыриськызы татысь студентъёс. Соос ёуказе нуналзылэсь тусбуйзэ, дышетйсьлэсь удиссэ быръёнзэ, азинлыко дышетйсьлэсь образзэ, «Вордскем кыл» журналлэсь удмурт кыллы но лулчеберетлы дышетоннын интызэ эскеризы.

2018-тй арын визьнодасъёслы, покчи классъёсын ужасьёслы но удмурт кылъя но литературая дышетйсьёслы «Вордскем кыл» амалтодослыко журналлэн этнокультура дышетон удисысь азинлыко ужан амальёсты вöлмытоннын интыез» чаклам семинаръёс пöлысь кыкез куартолэзе ортчизы. Огзэ 16-тй куартолэзе редакция Башкортостанысь Янаул ёросын татысь Дышетонъя управлениен ёш радъяз. Визьнодасъёс но дышетйсьёс редакцилэн туэ арлы чаклам ужпумъёсыныз тодматскизы, ужан амальёсты возматон кылулэсь аспöртэмлыкэ усьтйзы, проектной задача пыр 2019-тй арлы ёросылы сйзем номерез чаклазы.

21-тй куартолэзе Эгра ёросысь Дышетонъя управлениен ёш дасям семинаре Якшур-Бöдья ёросысь өнерчиос но пыриськызы. Редакцилэн чаклам ужрадъёсыз сяна, каргуртысь 1-номеро школаын ужасьёс но амальёсынызы тодматйзы. Озы 3-тй классын дышетекись Анастасия Тронина анай кылыз пумысен малпанъёссэ но мылкыдъёссэ шараяз, директорлэн дышетонъя воштйсьез Л.В. Волкова ужьюртысьтызы этнокультура дышетонлэсь сöзнэтэ усьтйз, ёросысь удмурт кылъя но литературая дышетйсьёслэн огазеяськонзылэн кивалтйсьез Л.Н. Белых Эгра музейм вылын удмурт кылэз но литератураез туалала вакытэ дышетон югдурен тодматйз. Семинар йылпумъяськиз 2019-тй арын Эгра ёросысь этнокультура дышетонлы сйзем номер пумысен кенешонэн.

Андрей КЛЕМЕНТЬЕВ